

**Uunga siunnersuut: Imigassaq pillugu Inatsisartut inatsisaata allanngortinneqarnissaa  
pillugu Inatsisartut Inatsisaat  
*Peqqissutsimut Naalakkersuisumit saqqummiunneqartoq***

**pillugu**

**Inuussutissarsiornermut Aatsitassanullu Ataatsimiititaliap siunnersuutip  
aappassaaneerneqarneranut**

**ISUMALIUTISSISSIONTAA**

Ataatsimiititaliap suliarinninnermini inuttarai:

Inatsisartunut ilaasortaq Mariane Paviassen, Inuit Ataqatigiit, Siulittaasooq  
Inatsisartunut ilaasortaq Aqqalu Jerimiassen, Atassut, Siulittaasup tullia  
Inatsisartunut ilaasortaq Knud Mathiassen, Inuit Ataqatigiit  
Inatsisartunut ilaasortaq Lars Poulsen, Siumut  
Inatsisartunut ilaasortaq Hans Aronsen, Inuit Ataqatigiit  
Inatsisartunut ilaasortaq Aslak W. Jensen, Siumut  
Inatsisartunut ilaasortaq Pele Broberg, Naleraq

UPA2022-mi marsip ulluisa 22-anni siullermeerinninnerup kingorna siunnersuut ataaatsimiititaliamit misissorneqarpoq.

**Siunnersuutip imarisai siunertaalu**

Ullumikkut aalakoornartortalinnik imigassanik 4,10-mik kimitussusilinnik  
saassaalliisinnaanermut akuersissuteqartut, 5,09-mik kimitussusilinnik  
sassaalliisinnaalernissaat Naalakkersuisunit siunnersuutikkut kissaatigineqarpoq.

Aammattaaq nappaatinik tuniluutiasunik siaruaattoqarneranut atatillugu Naalakkersuisut  
tuniniaanermik aamma sassaalliinermik killilersuigallarnissamut  
inerteqquteqarallarnissamulluunniit siunnersuutikkut piginnaatinneqarput.

Tamatuma saniatigut ulluni aqaguani freerfiusussani ammasarfennik sivitsuineq pillugu  
maleruagassat kiisalu inatsisip pineqaatissiinermut aalajangersagai erseqqissarneqarput.

**Inatsisartuni siunnersuummik siullermeerinninneq**

Siunnersuut siullermeerinninnermi amerlasuunit taperserneqarpoq. Demokraatilli siunnersuutip ilaa, Naalakkersuisut nappaatinik tuniluutiasunik siaruattoqarneranut atatillugu tuniniaanermik aamma sassaalliihermk killilersuigallarsinnaanissaannik inerteqquteqarallarsinnaanissaannilluunniit periarfissiisoq tapersinngilaat.

**Tusarniaaneq**

Siunnersuut piffissami oktoberip ulluisa aqqaneq aappaanniit 2021 novembarip ulluisa qulingiluaannut 2021 tusarniaatigineqarsimasoq Naalakkersuisut ilisimatitsipput. Tusarniaanermut tunngatillugu ataatsimiititaliaq allanik oqaaseqaatissaqanngilaq.

**Ataatsimiititaliap siunnersuummik suliarinninna**

Inatsisartuni siunnersuutip taperserneqarluarnera ataatsimiititaliap maluginiarpaa. Siunnersuutip pingaarnertut immikkoortui, nioqquteqarnerup ineriartornerata aamma covid-19-imik nappaalanermi misilittagaqalernerup pissusissamisoortumik kingunerisut ataatsimiititaliamit isigineqarput.

Inuiaqatigiit inuiaqatigiinnulluunniit pingaarutilit nappaammut nalinginnaasumik navianartumut illorsorneqarnissaat pisariaqarpat Naalakkersuisut aalajangersakkamik aatsaat atuinissaat tunngavissaatinneqartoq ataatsimiititaliamit oqaatigineqassaaq. Aamma tunngavissaatinneqarpoq, killilersuinerit inerteqqutilluunniit taamaaliorermi siunertap angunissaanut pisariaqartut sinnerlugit ingerlatiinnarneqassanngimmata.

Siunnersummi nr. 1-imut aamma 2-mut, imigassap aalakoornartortallip akuerisaasup 4,10-mit 5,09-mut allanngortinneqarneranut, tunngatillugu nassuaatini allassimavoq, imigassanik aalakoornartortalinnik 4,10 tikillugit kimittussusilinnik niurnissamut akuersissummik piginnittut immiaaqqanik il.il. assigiinngitsunik amerlanerusunik pisisartunut 5,09 tikillugit kimittussusilinnik nioqquteqarnissaminntu qinnuteqarsinnaalissasut.

Tamanna ima paasineqarsinnaavoq: imigassat aalakoornartortallit kimittussusiannik siunnersummi qaffaaneq atorsinnaajumallugu akuersissuteqareersut qinnuteqaqqittariaqassasut. Taamaattoqartariaqarnera ataatsimiititaliap ilimaginegila, aammalu akuersissuteqareersut inatsisip atuutilernerani qinnuteqaqqeqqaaristik 5,09 procent tikillugu kimittussusilinnik imigassanik sassaalliisinnaanissaat ilimagalugu. Taamatut paasinninneq aappassaaneerinninnissamut akissuteqaamminni upernarsaqqullugu Naalakkersuisut qinnuigineqarput

Siunnersutigineqartumut § 41 a-mut tunngatillugu, ataatsimiititaliap maluginiarpaa, imigassanut aalakoornartortalinngut killilersuinermut imaluunniit tuniniaanermut sassaalliiinermullu Naalakkersuisut aalajangersakkanik atuukkallartussanik piginnaatinneqarnerat pineqartoq. Kommuniniit imaluunniit nunaqarfimmi aqutsisut kaammattuuteqareernerisa kingorna siunissami malittarisassat aalajangersaavagineqartarnissaannut tamanna allannguuteqartitsinavianngilaq, tak. § 41 atuutiinnassaaq.

Naalakkersuisunut piginnaatitsissut siunnersutigineqartoq nappaalasoqarneranut atatillugu taamaallaat atorneqarsinnaasunngortinneqartoq ataatsimiititaliap maluginiarpaa, aalajangersagarli atuuttoq kommunit imaluunniit nunaqarfinni aqutsisut qinnuteqarnerannik suli tunngaveqartussaasoq, taanna siammasinnerusumik atorneqarsinnaasoq, tassa meeqqat pitsaasumik atugaqarnissaannut imaluunniit innuttaasut isumannaatsuuunissaannut il.il. imigassat aalakoornartortallit ulorianartorsiortitsinerini.

### **Siunnersutip aningaasaqarnikkut kingunissai**

Inuiaqatigiinni inuiaqatigiinnulluunniit pingaarutilinni nalinginnaasumik navianartumik nappaalasoqarneranut atatillugu imigassamik tuniniaanerup matugallarneqarsinnaanera eqqaassanngikkaanni siunnersuut annertuumik kinguneqartussatut naatsorsutigineqanngitsoq Naalakkersuisut oqaatigaat.

### **Ataatsimiititaliap inassuteqaatai**

**Ataatsimiititaliap isumaqatigiittup** siunnersuut **akuersissutigineqassasoq** inassutigaa.

Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappassaaniigassanngortippaa.



Mariane Paviaen  
Siulittaasoq




---

Aqqalu Jerimiassen  
Siulittaasup tullia



---

Knud Mathiassen



---

Hans Aronsen




---

Lars Poulsen



---

Aslak W. Jensen



---

Pele Breberg